

Wanita bukan 'objek seks': PM

BH 27 SEP 2000

Oleh Kadir Dikoh, Hasliza Hassan dan Munaarfah Abu Bakar

KUALA LUMPUR, Selasa – Datuk Seri Dr Mahathir Mohamad kesal kerana wanita bukan saja kerap didiskriminasikan, malah selalu dipandang sebagai 'objek seks' di tempat kerja.

Sehubungan itu, kata Perdana Menteri, sikap sensitif terhadap wanita perlu, khususnya di kalangan penggubal dasar, perancang ekonomi serta pembuat keputusan dalam sektor awam dan swasta.

Beliau berkata, masanya sudah tiba bagi kerajaan di Asia-Pasifik mengotakan kata-kata indah mereka mengenai perspektif jantina dalam perancangan pembangunan.

Rancangan itu hendaklah dilaksanakan dengan cara yang berkesan supaya benar-benar memberi faedah kepada wanita miskin di bandar dan desa.

"Dasar dan program yang memberi perhatian kepada soal jantina akan menjamin penyertaan wanita, bukan saja dalam pembasmian kemiskinan

malah dalam kegiatan ekonomi lain yang akhirnya akan membantu kerajaan dengan meningkatkan pertumbuhan ekonomi.

"Malangnya, wanita didiskriminasikan kerana perbezaan. Perbezaan bukanlah bermakna taraf tidak sama. Namun wanita mendapat layanan yang tidak sama kerana perbezaan mereka dengan lelaki - dari segi fikiran, perasaan dan tingkah-laku.

"Di tempat kerja, pekerja wanita selalunya dipandang sebagai suri, ibu, kakak atau adik, pekerja pinggir dan sebagai objek seks' manakala dalam gerakan kenaikan pangkat, adalah dianggap yang peluang diberikan secara saksama kepada semua, lelaki dan wanita," katanya.

Dr Mahathir berucap merasmikan mesyuarat kedua Jawatankuasa Pemantau Kemajuan Wanita Luar Bandar dan Kepulauan Wilayah Asia Pasifik (RSC-AP) di sini hari ini. Seramai 150 peserta dari 16 negara anggota, terma-

suk Malaysia, hadir.

Mesyuarat dua hari itu antara lain membincangkan kemajuan terutama dalam usaha meminta kerajaan memudahkan perubahan program kredit mikro dalam institusi kewangan bagi wanita luar bandar.

Pertubuhan itu terdiri daripada isteri ketua-ketua negara dan ia ditubuhkan pada 5 September 1995, dengan matlamat memantau pelaksanaan pelan bertindak Deklarasi Geneva bagi pembangunan wanita luar bandar.

Antara yang hadir ialah wanita pertama Iran Zohreh Khatami Sadeqi; Usha Narayanan (India); Azadsurenigin Oyunbileg (Mongolia); Sehba Musharraf (Pakistan); Roslyn Morauta (Papua New Guinea) dan Thongvanh Siphandone (Laos).

Sementara itu Australia, Tonga, Filipina, China, Indonesia, Maldives, Uzbekistan, Krygyzstan dan Kazakhstan menghantar wakil ke mesyuarat itu.

Perdana Menteri berkata, lelaki dan wanita mempunyai kelebihan, kekuatan dan kelemahan masing-masing. Allah memerintahkan supaya lelaki dan wanita menggunakan kelebihan mereka untuk saling membantu bagi melaksanakan tugas serta tanggungjawab dengan adil dan saksama.

Jantina, katanya, tidak merujuk kepada jenis lelaki atau perempuan, tetapi kepada corak pemi-

kiran sesuatu masyarakat mengenai apa yang dianggap sebagai "wajar dan boleh diterima mengenai peranan dan tingkah-laku lelaki dan wanita."

"Walaupun dalam masyarakat atau budaya konservatif, fungsi tradisional lelaki disebut sebagai pencari nafkah dan wanita sebagai orang rumah, dalam masyarakat maju, konsep itu berubah mengikut keperluan masyarakat berkenaan yang

merujuk kepada peranan lelaki dan wanita di rumah, dalam masyarakat dan dalam pembinaan negara.

"Ia berasaskan kepada kemampuan, kemahiran dan kecekapan individu sebagaimana yang diperlukan oleh pasaran pekerjaan, sektor korporat, kerajaan dan bagi pembangunan keluarga dan masyarakat," katanya.

Beliau berkata, malangnya corak pemikiran tra-

disional mengenai kepercayaan, sikap dan tanggapan yang serong terhadap kebolehan wanita, menguasai logik, pengetahuan dan pemerhatian tentang kemampuan dan kebolehan sebenar wanita.

Katanya, dalam menggalakkan kesedaran jantina, rangkaian strategik perlu diwujudkan dengan perancang dan penasihat ekonomi meliputi keseluruhan jentera pentadbiran kerajaan.